

- 1^r Wer on verdienst / will han den lon
- 2^r Vnd vff eym schwachen ror will ston
- 3^r Des anschlag würt vff krebsen gon



Furwissenheit gottes.

- 1 Man fyndt gar manchen narren ouch
- 2 Der ferbet vß der gschrift den gouch
- 3 Vnd duncket sich stryffecht vnd gelert
- 4 So er die bücher hat vmbkert

5 Vnd hat den psalter gessen schyer
 6 Biß an den verß / Beatus vir /
 7 Meynend / hab gott eym güts beschert
 8 So werd jm das nyemer entwert /
 9 Soll er dann faren z^o der hell
 10 So well er syn eyn gü^t gesell
 11 Vnd leben recht mit andern wol
 12 Jm werd doch was jm werden sol /
 13 Narr loß von solcher fantasy
 14 Du steckst sunst bald jm narren bry
 15 Das gott on arbeit belonung gyt
 16 Verloß dich druff / vnd bach du nyt
 17 Vnd wart / wo dir von hymel kundt
 18 Eyn brotten tub / jn dynen mundt
 19 Dann solt es also schlecht z^u gon
 20 So würd eym yeden knecht syn lon
 21 Gott geb / er arbeit oder nit
 22 Das doch nit ist vff erden sytt
 23 War vmb wolt gott dann ewig lon
 24 Eym geben / der wolt mü^{ss}ig gon
 25 Geben eym knecht der schlaffen wolt
 26 Syn rich / vnd eyn so grossen solt /
 27 Jch sprich das vff erd nyemans leb
 28 Dem gott on gnaden etwas geb
 29 Oder dem er sy pflichtig üt
 30 Dann er ist vnß gantz schuldig nüt
 31 Eyn fryer herr / schenckt wem er will
 32 Vnd gibt vß wenig oder vil
 33 Wie jm geliebt / wän gat es an
 34 Er weiß / war vmb ers hat gethan

14 steckst *GW5046 GW5047*] gsteckst *GW5041*

35 Eyn hafner vß eym erdklotz macht
 36 Eyn erlich gschyrr / sunst vil veracht
 37 Als kachlen / hæfen / wasserkrûg
 38 Do man jn / böß / vnd güttes tûg
 39 Die kachel spricht nit wyder jn
 40 Jch solt eyn krûg / eyn hafen syn
 41 Gótt weiß (dem es alleyn zû stat)
 42 War vmb er all ding geordnet hat /
 43 War vmb er Jacob hat erwelt
 44 Vnd nit Esau jm glich gezelt /
 45 War vmb er Nabuchodonosor
 46 Der vil gesündet hatt lang jor
 47 Strofft / vnd zû rûw doch kumen lyeß
 48 Vnd zû sym rich / noch dem er bûsßt /
 49 Vnd Pharao mit geyßlen hart
 50 Strofft / der do von doch böser wart /
 51 Eyn artzeny macht eynen gsunt
 52 Vnd macht den andern mer verwundt
 53 Dann eyner noch dem er entpfandt
 54 Gotts stroff / vnd der gewaltigen handt
 55 Bdocht er syn sünd / mit sünfftzen vil /
 56 Der ander brucht syn fryen will
 57 Vnd merckend gotts gerechtikeyt
 58 Myßbrücht er syn barmhertzigkeyt /
 59 Dann gott nye keynen hatt verlon
 60 Er wust / war vmb ers hatt gethon
 61 Wann ers wolt als glych han eracht
 62 Er hett wol nüt dann rosen gmacht
 63 Aber er wolt ouch dystlen han
 64 Do man syn gerechtikeyt sâh an

55 sünfftzen GW5046 GW5047] fufftzen GW5041

65 Der was ein nydisch schalckhafftig knecht
 66 Der meynt syn herr dāt jm vnrecht
 67 Do er jm gab syn gdingten solt
 68 Vnd gab eym andern was er wolt
 69 Der wenig arbeyt hatt gethon
 70 Dem gab er doch eyn glychen lon
 71 Man fyndt gar vil gerechter lüt /
 72 Die hye vff erd hant vbelzyt
 73 Vnd loßt jn gott zů handen gon
 74 Als ob sie vil sünd hetten gthon
 75 Dar gegen fyndt man narren dick
 76 Die zů all sachen hand vil glück
 77 Vnd jnn jrn sünden syndt so fry
 78 Als ob jr werck gantz heylic sy /
 79 Das sint die vrteyl gotts heymlich
 80 Der vrsach weiß nyeman gentzlich
 81 Je me man die zů gründen bgärt
 82 Je mynder man dar von erfärt
 83 Ob yeman schon wânt das ers wiß
 84 So ist er syn doch vngewiß
 85 Dann all ding werdent vns gespart
 86 Jnn küfftig / vnsicher / hynfart /
 87 Dar vmb loß gots fürwissenheynt
 88 Vnd ordenung der fürsichtikeynt
 89 Stann wie sie stat / thů recht vnd wol
 90 Gott ist barmhertzig / gnaden vol
 91 Loß wissen jnn / als das er weiß
 92 Dů recht / den lon ich dir verheiß
 93 Beharr / so gib ich dir myn sel
 94 Zů pfand / du kumbst nit jnn die hell /

65 schalckhafftig GW5046 GW5047] fchalckhafft GW5041